

ՀԱՐԱՒԱՅԻՆ ԻՐԱՆԱՀԱՅՈՒԹԵԱՆ ՆՈՒԻՐԱՏԻՈՒԹԻՒՆԸ ԳԵՏԱՇԷՆՑԻՆԵՐԻՆ

Հայ առաքելական եկեղեցու իրանի հարաւային թեմի առաջնորդ Կորիւն արքեպիսկոպոս Պապեանը եւ իրեն ընկերակցող ազգայիններ պրնֆ. Թաթուլ Օհանեանը եւ Հրայր Շահնազարեանը, որոնք պաշտօնական այցելութեամբ Հայաստանում են գտնուում, ուրբաթ Մայիսի 24ին Ծաղկաձորի «Նարեկ» հիւրանոցում հանդիպեցին Գետաշէնից տեղահանուած հայերին: Առաջնորդ Սրբազանը գնահատեց գետաշէնցիների եւ մարտունաշէնցիների ցուցաբերած հերոսական դիմադրութիւնը խորհրդային բանակի եւ ՕՄՕՆականների դէմ, յիշեց քաջաբար զոհուած հայ ֆեդայիներին եւ վերջում իր ղեկավարած թեմի հայութեան անունից տեղահանուած զիւղացիների խոր-

հրդին յանձնեց 35200 ռուբլի դրամ, այդտեղ պատասպարուած 352 գաղթականներին հարիւրական ռուբլի նուիրելու համար: Յուզիչ մթնոլորտում արտայայտեցին նաեւ թեմի պատգամաւորական ժողովի ատենապետ Թ. Օհանեանը եւ թեմական խորհրդի ատենապետ Հ. Շահնազարեանը, որոնք բացատրեցին արտերկրի հայութեան ապրումներն ու տարած աշխատանքները՝ կապուած Արցախի հարցի պաշտպանութեանը: Շնորհակալական խօսքով հանդէս եկան զիւղացիութեան ներկայացուցիչները:

Հարաւային իրանահայութեան թեմի պատուիրակութիւնը Վազգէն Ա. կաթողիկոսի հրաւերով Մայիսի 10ից ի վեր գտնուում է Ա. Էջմիածնում: